



**ACORDO DE COLABORACIÓN ENTRE A CONSELLERÍA DE MEDIO AMBIENTE,
TERRITORIO E VIVENDA E A AXENCIA GALEGA DE INFRAESTRUTURAS PARA
O FINANCIAMENTO DE DIVERSAS ACTUACIÓNS DERIVADAS DO PLAN hURBE
2019-2020**

Santiago de Compostela,

05 AGO. 2019

REUNIDOS

Dunha parte, **Ángeles Vázquez Mejuto**, en nome e representación da Consellería de Medio Ambiente, Territorio e Vivenda, actuando no exercicio do seu cargo, en virtude do Decreto 94/2018, 26 de setembro (DOG núm 185, 27 de setembro de 2018) e en función das atribucións que lle confire o artigo 34.10 da Lei 1/1983, do 22 de febreiro, reguladora da Xunta e da súa presidencia.

Doutra parte, **Ethel María Vázquez Mourelle**, conselleira de Infraestruturas e Mobilidade, nomeada para o devandito cargo polo Decreto 95/2018, do 26 de setembro, e presidenta da Axencia Galega de Infraestruturas actuando no exercicio das competencias que ten atribuídas polo artigo 9 dos estatutos da Axencia Galega de Infraestruturas, aprobados mediante Decreto 173/2011, do 4 de agosto.

As partes recoñécense mutua capacidade para obrigarse a convir, e para este efectos,

EXPOÑEN

Primeiro. Que, a Axencia Galega de Infraestruturas foi creada pola Lei 16/2010, do 17 de decembro, desenvolvida polo Decreto 173/2011, do 4 de agosto. Conforme o establecido na dita lei, ao dito organismo correspóndelle impulsar, coordinar e xestionar a política autonómica en materia de estradas e, en especial, a planificación, protección, construción, conservación e explotación das estradas que sexan competencia da comunidade autónoma, e os servizos que se poidan instalar ou





desenvolver nas ditas infraestruturas; e, tamén, garantir o uso e defensa do patrimonio viario. Ademais a axencia poderá, directamente ou a través de sociedades adscritas ou sobre as que teña atribuída a súa tutela funcional, planificar, proxectar, construír, conservar e explotar outras infraestruturas, en virtude das encomendas ou encargos que reciba dos órganos ou entidades competentes.

Segundo.- A Consellería de Medio Ambiente, Territorio e Vivenda é o órgano da Administración da Comunidade Autónoma ao que lle corresponden as competencias e funcións en materia de ambiente, ordenación do territorio e urbanismo, conservación do patrimonio natural e vivenda, conforme o establecido no Estatuto de autonomía para Galicia.

Dentro da Consellería correspóndelle á Dirección Xeral de Ordenación do Territorio e Urbanismo a realización de actuacións de mellora de contornas urbanas, de accesibilidade e supresión de barreiras arquitectónicas e de equipamentos públicos que teñan por finalidade a revitalización do territorio e o reequilibrio territorial, de conformidade ao apartado m) do artigo 13.1 do Decreto 42/2019, do 28 de marzo, polo que se establece a estrutura orgánica da Consellería e do Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia.

Terceiro.- Esta Dirección Xeral conta con programas dirixidos á dotación de equipamentos públicos e de mellora de contornas urbanas.

Os equipamentos urbanos desempeñan un papel fundamental como elemento dinamizador de desenvolvemento social e cultural da nosa sociedade e son, ademais, elementos estruturais na contorna urbana.

As intervencións definidas como contornas urbanas recollen as actuacións enfocadas a mellorar o espazo público tendo en conta as necesidades de utilización e en relación coa mellora da contorna, o ambiente e a calidade de vida.

Cuarto.- A Consellería de Medio Ambiente, Territorio e Vivenda a través dos plans MURBE trata de dar resposta á necesidade de humanización das vilas e de





incrementar o atractivo dos núcleos rurais como factor determinante do equilibrio territorial.

O conxunto de vilas dispersas pola nosa xeografía, articulan e centralizan a vida económica, social e cultural do territorio que se atopa baixo a súa área de influencia. Constitúen verdadeiros motores de dinamización social e económica ao converterse en puntos de localización dun importante número de servizos públicos e privados que permiten achegar o modelo urbano a todo o territorio.

A súa influencia ven determinada por diversos factores como accesibilidade ao núcleo, o nivel de servizos, equipamentos e actividades de ocio que subministra ao conxunto da poboación, e o seu papel como centro comercial para a economía da zona.

As Directrices de Ordenación do Territorio aprobadas definitivamente polo Decreto 19/2011, do 10 de febreiro, distingue, segundo a diferente función que desempeñan no conxunto do sistema territorial de Galicia:

- Espazos rurais integrados: correspóndense coas zonas máis próximas ás áreas urbanas, cuxa característica principal ven dada por constituír zonas de expansión urbana das cidades veciñas, cun adecuado acondicionamento territorial (equipamentos, dotacións, infraestruturas, etc)
- Espazos rurais intermedios: adoitan situarse na contorna das vilas intermedias e contan cun nivel de servizos, dotacións e infraestruturas aceptable
- Espazos rurais periféricos: os máis alonxados das zonas urbanas (zonas de montaña de topografía complexa) onde a crise demográfica preséntase como un problema acuciante, cun nivel deficiente de infraestruturas, dotacións e equipamentos.

Os plans hURBE centran os seus obxectivos sobre estes dous modelos territoriais.

Quinto.- O PLAN hURBE 2019-2020 continúa na senda iniciada polos PLANS hURBE 2010-2013 e 2014-2017 tratando de articular unha estratexia de posta en valor das vilas, tanto as grandes como as pequenas, e dos núcleos rurais, que permita crear as condicións propicias para o seu desenvolvemento sostible, sen prexuízo de actuacións puntuais nas cidades, que se encadren nos obxectivos fixados neste Plan.





A tal fin e preciso, acometer actuacións orientadas a frear o despoboamento, potenciando as infraestruturas, servizos e equipamentos e, en definitiva, mellorando o benestar e a calidade de vida dos seus habitantes.

Este Plan persegue os seguintes obxectivos:

1. Promover o desenvolvemento das vilas e dos núcleos rurais con criterios de sustentabilidade económica, medioambiental e social.
2. Mellorar os equipamentos e dotacións, aumentando a variedade e elevando os niveis de servizos có fin de proporcionar unha oferta de calidade e axeitada ás necesidades da poboación có fin de incrementar o atractivo das vilas e dos núcleos rurais da nosa comunidade autónoma.
3. Fomentar a conservación e posta en valor do patrimonio cultural e histórico das vilas.
4. Incorporar as tecnoloxías de información tanto nas instalacións como na previsión de usos e actividades dos equipamentos municipais.
5. Prestar especial atención a aquelas accións sensibles á especificidade de xénero que garantan un acceso máis equitativo de mulleres e homes aos bens e servizos

Para a consecución destes obxectivos desenvolveranse accións nas mesmas áreas de actuación que as contempladas no PLANS hURBE 2010-2013 e 2014-2017:

Programa de equipamentos públicos, cos seguintes obxectivos específicos:

- Incrementar a oferta de infraestruturas e equipamentos óptimos para o desenvolvemento de actividades e eventos de carácter cultural que permitan garantir o acceso á cultura á totalidade da poboación.
- Contribuír á dinamización cultural, económica e de cohesión social, priorizando as actuacións en comarcas carentes destas infraestruturas.

Programa de humanización de rúas, cos seguintes obxectivos específicos:

- Recuperación de espazo público peonil para facilitar os desprazamentos e potenciar a súa función como espazo de encontro dos veciños.
- Mantemento e conservación das rúas en óptimas condicións de seguridade, para os vehículos e transeúntes.





Programa de urbanización e mellora de espazos públicos, cos seguintes obxectivos específicos:

- Rexeneración medioambiental de espazos degradados para o seu uso pola colectividade.
- Incrementar a oferta dos espazos de convivencia, con especial atención a aqueles que revistan un especial interese histórico, artístico ou arquitectónico

Sexto.- Conforme ao artigo 10 da Lei 14/2013, do 26 de decembro, de racionalización do sector público autonómico, os principios de colaboración, cooperación e asistencia no ámbito interno do sector público autonómico faranse efectivos a través dos seguintes instrumentos e procedementos: (...) e) Acordos de colaboración ou cooperación para o financiamento conxunto de contratos para a satisfacción dunha finalidade común.

Concretamente, o artigo 14 da devandita lei dispón o seguinte:

1. A Administración xeral da Comunidade Autónoma e as entidades do sector público poderán formalizar acordos de colaboración para o servizo aos intereses xerais mediante o desenvolvemento conxunto de tarefas de interese público da súa competencia.

2. A colaboración ou cooperación consistirá na participación conxunta e efectiva no desenvolvemento da actividade común, mediante aportacións de traballos de organización, medios persoais e materiais ou recursos financeiros para a finalidade compartida, de acordo coas respectivas competencias, e será sempre diferente das estruturas contractuais onerosas reguladas na lexislación de contratos do sector público.

Sétimo.- No Plan Estratéxico 2015/2020 da Xunta de Galicia no seu Eixe 3: "Crecemento sustentable, territorio, mar, agricultura, gandería e montes"; na prioridade de actuación 3.4 "conservación da natureza, ordenación do territorio e da paisaxe e cohesión territorial" establece como obxectivo estratéxico (E01) "completar o proceso de ordenación urbanística do territorio galego, fomentando a participación da





ciudadanía no mesmo e a protección do solo e apoio á administración local". Para elo propónse este acordo de colaboración co fin de dar cumprimento a estes obxectivos.

Oitavo.- A AXI realiza obras de infraestruturas de carácter xeral nos concellos dentro do ámbito das súas competencias de planificación, proxección, construción, conservación e explotación das estradas que sexan competencia da comunidade autónoma, e os servizos que se poidan instalar ou desenvolver nas ditas infraestruturas.

No ano 2019 tiña previsto acometer unha serie de obras en diversos concellos que non se van desenvolver no presente exercicio, polo que, dada a repercusión do Plan hURBE nas infraestruturas e a vinculación destas aos intereses xerais, acordou instrumentar a colaboración económica coa Consellería de Medio Ambiente, Territorio e Vivenda a través deste acordo para a correcta execución das actuacións previstas no dito plan.

Tendo en conta o anterior e con base no principio de coordinación administrativa e unidade de acción que debe presidir a actuación dos órganos administrativos da Xunta de Galicia, e dado o interese común e obxectivos coincidentes, as partes intervinientes manifestan a súa vontade de colaboración no desenvolvemento deste plan e están interesadas en establecer o presente acordo de colaboración con suxeición ás seguintes

CLÁUSULAS

PRIMEIRA.- Obxecto

O obxecto deste acordo consiste en establecer as bases da colaboración económica entre a Consellería de Medio Ambiente, Territorio e Vivenda e a Axencia Galega de Infraestruturas, que permitan a execucións das distintas actuacións derivadas do Plan hURBE para os anos 2019-2020.





SEGUNDA.- Financiamento

A Axencia de Infraestruturas achegará 500.000 €, que se destinarán ao financiamento das actuacións derivadas do Plan hURBE 2019-2020.

O importe correspondente á achega da Axencia de Infraestruturas será obxecto de retención de crédito para a súa posterior baixa nas aplicacións orzamentarias seguintes:

APLICACIÓN	CÓDIGO DE PROXECTO	IMPORTE
08.A1.512B.741.01	2010 00266	500.000,00€

A oportuna retención de crédito para transferencias no orzamento da Axencia de Infraestruturas permitirá á Consellería de Medio Ambiente, Territorio e Vivenda incrementar o crédito no seu orzamento de gastos para este mesmo fin. A dita transferencia terá lugar na aplicación orzamentaria seguinte:

APLICACIÓN	CÓDIGO DE PROXECTO	IMPORTE
07.04.521A.607.1	201600346	500.000 €

TERCEIRA.- Comisión de seguimento

Para o seguimento e interpretación deste acordo, créase unha Comisión de Seguimento que estará integrada por dous representante da Consellería de Medio Ambiente, Territorio e Vivenda, do cal un será o presidente desta comisión e dous representante da Axencia Galega de Infraestruturas.

A Comisión terá as seguintes funcións:

- Seguimento e control do desenvolvemento do acordo
- Interpretar e resolver as dúbidas que se poidan suscitar na aplicación e cumprimento do acordo.

CUARTA.- Natureza

O presente acordo de colaboración rexerase pola Lei 14/2013, do 26 de decembro, de racionalización do sector público autonómico,





Segundo o artigo 18 da dita lei, as discrepancias poidan xurdir resolveranse nos termos previstos no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

QUINTA.- Publicidade e rexistro

As partes asinantes deste acordo outorgan o seu consentimento expreso para que os datos persoais e o resto das especificacións que constan no citado acordo sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.

SEXTA.-Protección de datos persoais.

De conformidade co establecido no artigo 14 e seguintes da Lei 19/2013, de 9 de decembro, de transparencia, acceso á información pública e bo goberno, e no artigo 29 da Lei 1/2016, do 18 de xaneiro, de transparencia e bo goberno, as partes asinantes manifestan o seu consentimento para que os datos persoais que constan no presente acordo e demais especificacións contidas no mesmo poidan ser publicados no Portal de Transparencia e Goberno Aberto.

As partes comprométense a tratar os datos persoais que foran postos no seu coñecemento unicamente coa finalidade e alcance de executar o establecido neste acordo, respectando os requisitos establecidos no Regulamento (UE) 2016/679 do parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos, en diante, RXPd) e na Lei orgánica 3/2018, do 5 de decembro, de protección de datos persoais e garantía dos dereitos dixitais, e demais normativa concordante na materia.





SÉTIMA.-Vixencia

O prazo de vixencia do acordo será desde a súa sinatura ata o 31 de decembro de 2019. As partes poderán modificar, sempre que sexa de mutuo acordo, ou denunciar o acordo en calquera momento.

En proba de conformidade con canto antecede, as partes asinan este acordo, no lugar e data sinalados no encabezamento.

A conselleira de Medio Ambiente,
Territorio e Vivenda

Angeles Vázquez Mejuto



A presidenta da Axencia Galega
de Infraestruturas

Ethel María Vázquez Mourelle

